



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7 Yangia anidakangma : Tir Yimym tir\_yimym

tir yimym TAPAK 8

**Syria opposition forces-i Tir Bashar al-Assad atsüngdokogo**

**Man Utd sporting director Ashworth-i club toktsüogo**

VOL. XXII ISSUE NO. 60 (ADOK 60) DIMAPUR TENTONÜ (MONDAY) LUCHII (DECEMBER) 09, 2024 ₹ 5.00

## Aor dak tashiyim benshiba magizüker: DAYO

**Dimapur, December 8, 2024 (TYO):** Dimapur aser temeket nung Aor dang tashiyim agi sen meshiba mesüra özüngi memelaba tax saruba magizüker ta Dimapur Ao Youth Organisation (DAYO)-i nenshia metetdaksüogo.

Benjung mapang tonga arudang pei tepok mesütsü atema aayangertem, entrepreneurs, dokantem aser sorkar mapa inyakertem amokmerenba aser tashiyim agi sen meshiba mapa kanga bulua inyakba onoki angazükogo, ta DAYO-i ashi.

Ao Senso Telongjem Dimapur (ASTD)-i December 2018 nung Aor amokmerenba aser merenshiba magizüker ta bangzüng ka renema lir aser onok

iba nung noktaka lir. Iba inyakym anema Aor temzüng aser sobaliba inyakym ama inyaka aotsü ta parnokisa metetdaksüogo.

DAYO-i mapang talangka "Sorkar Ka, Saru Ka" tangatetba atema noktaka aser jembia arur. Tawa tashiyim aser amokmeren mapa inyakba mapang Aor ajak kükümü aser longjema alitsü ayongzüker. Tashiyim agi sen meshiba mesüra özüngi memelaba tax saruba osang mapang shitak nung DAYO Helpline- 8974851911 nung sangokjang ta parnokisa ashi.

Dimapur aser Nagaland nung aliba senso ajaki lokti den meputep mapa inyakba anema külemi longjemer noktaksü ayongzüker ta DAYO-isa metetdaksüogo.

## Kisama nung UK tourist ka asü

**Kohima, December 8, 2024 (TYO):** Hornbill Festival nung Honibarnü United Kingdom nungi aruba tourist ka ajungbena asü.

Iba nisung ya arishi küm 67 tain Nigel Richard lasü aser pa ya Bradford, United Kingdom nungi aru ta police-i ashi.

Pa kija dang aru Honibar nikingdang 4:30 ako meta Kisama nung guide ka den külemi gari atadang ajungbena

teku ashir ta ashi. Iba atema Kisama nung health centre-i pa anir ao aser check-up asüba sülen Red Cross Ambulance ka nung Oking Hospital Kohima-i anir ao. Ajisüaka tia maka yasüng 7:30 ako meta pa asü.

Asür Richard mang nung post-mortem asüba sülen Nagaland Tourism Department-i pa mang kidangi meyipa yokogo.

## Kohima Night Carnival kanga longsoa amonger

**Kohima, December 8, 2024 (TYO):** Kohima Chamber of Commerce & Industries (KCCI)-i ayongzüka Kohima Night Carnival kanga longsoa agidar.

Anogoshia local aser tourist 2000 shi kati Y Junction nungi Razhu point tashi carnival semdang, ta KCCI Kohima Night Carnival Convenor Roko Kire-i ashi.

Kohima Night Carnival nung stall ajak agi 176 lir. Iba dak alia

Task Force for Music and Arts-i anogoshia KCCI Control room nung local artists sempet sayadaksür.

Taküm tesenpertem atema tongtipang shilem kaji Night Carnival anogo tenzüker troknübuba nung Hornbill Parade agiba lasü. Iba sentong ya Kohima Village Youth Organisation-i Tourism Department aser KCCI den yaritepa agia lasü ta Kire-i ashi.

## Chungtia yimteni Chalukümba senso nungi jentokba agien

**Dimapur, Dec.08 (TYO) :** Taoba Nagaland state assembly general election dak sendakba maparen nung mepelatop tulu adoka Chungtia Medemchanger Putu Mendeni par senso T.Chalukümba pa arishi tepiyong Chungtia senso nungi jendokba telemtetba ka pamokisa tawato agienogo aser paji Chungtia senso tajung ka ta tanaben meyipa züngokogo.

Iba telemtetba ya Gauhati High Court Kohima bench nung obendangertemi T.Chalukümba benokba ken o angadanger, taküm 2024 küm March 21 nü Chungtia yimten telemtetba aija obendang agütsüba nung amendaker, Chungtia Medemchanger Putu Mendeni agia lasü.

2023 küm Nagaland assembly general election nung

T.Chalukümba par yimteni shimba candidate meyarri pa-ang election nung toktepba mapa anema Chungtia yimteni pa 2023 küm June 30 nü Chungtia senso nungi arishi tepiyong jendoka lasü.

Ajisüaka, par yimten telemtetba anema T.Chalukümba Gauhati High court, Kohima bench okadak ken o benok. Iba ken o angadanger obendangertemi Nagaland Village & Area Council Act aser India temzüng arla 19 amshia pa metentsü aser Chungtia Medemchanger Putu Mendeni telemtetba aitsü. Iba telemtetba ajanga Chungtia yimteni T.Chalukümba Chungtia senso nung züngokogo.

(Senso candidate tamakok indang Yimobilem, tapak 4, nung züngangma )

## DONER Summit nung Minister Kenye-i Nagaland yaritsü ayongzüker



**Kohima, December 8, 2024 (TYO):** Power & Parliamentary Affairs minister K. G. Kenye-i 7th North East States on Power and Energy Mix atema DONER Summit nung denogo.

December 8 nü New Delhi nung Asthalaxmi Mahotsav anogo asemububa nung iba sentong agia lasü.

"Ministry of DONER-i iba sentong ayonga agiba atema kanga pelar aser talisa Union Minister Jyotiraditya Scindia dang balaka pelaba shisemer. Tarutsü nunga NE State tem melentepa ibala sabangtem

agütsü tebilemba lemsateper" ta Minister Kenye-i o jembidang ashi.

Paisa telok den Nagaland State nung power tensa osang lemsatepba den tang nungdabatem metetdaksü.

Nagaland nung tang Hydro potential (In operation + Identified) available ji 633 MW shi ka lir. Iba nungi 104 MW shi ka dang agiteter aser 529 MW magiteter ta Kenye-i ashi.

2032 tashi nung Nagaland nung 360 MW nungdaksü ta asadangteta lir aser iba atemaji 1150.5 MVA transmission

capacity nungdaker, ta Kenye-isa ashi.

"Total capacity requirement 1150.5 nungi tang 400.5MVA lir aser NERPSIP kübok 240 MVA atema mapa inyakdar saka 510MVA agi meperir. Tanünga 510 MVA ya Nagaland asoshi Intra-state transmission plan 2030/32 nung shidangogo aser ibaji CEA-i finalized süogo" ta Minister Kenye-isa ashi.

Iba sentong nung 132/33kV Substations aser transmission lines 476kms dena lir aser iba mapa nung Rs. 1150.68 Crores nungdaker paisa shisem.

## Kisama nung Naga nunger sobaliba balala sayur

**Dimapur, December 8, 2024 (TYO):** 25 buba Hornbill Festival 2024 anogo tibuba nung Nagaland kin 18-i Kisama Main Arena nung sobaliba shilem balala agiogo.

Tanep agiba sentong nung Union Minister for Labour & Employment and Youth Affairs & Sports, Dr. Mansukh Mandaviya-i tetushi süa jaoker ama shilem agia lasü.

Iba session atema Roads &

Bridges, G. Kaito Aye-i host aser School Education and SCERT Advisor Dr. Kekhrielhoulie Yhome , Chairperson Awan Konyak aser Advisor to the Chief Minister and IDAN Chairman Abu Metha nungeri co-host ama shilem agia lasü.

Tanü anüngdanga agiba sentong nung Ministry of Textiles nungi Additional Secretary & Financial Advisor-i tetushi süa jaoker ama shilem agi.

Iba session nung Housing and Mechanical Engineering Minister P. Bashangmongba Chang-i host aser NRE, NSDMA Advisor Z. Nyusietho Nyuthe o NEPED Chairman, Subongmeren nati co-host ama shilem agia lasü.

Anüngdang session nungsa Commander Works Engineer (CWE) Military Engineer Services, Ministry of Defense, Government of India Nazneen Banu, IDSE aden.

## Syria nung Assad-i President menden toktsür jena ao

**New Delhi, December 8, 2024 (Agencies):** Syria Bashar al-Assad-i Deobarnü President menden toktsüogo aser mejangjaba tesem kati ogo ta Russia-i metetdaksü.

Bashar al-Assad-i iba rara nung shilem agir aika den olemtepba sülen President menden yutsü. Pai sorkar dang timi tashi agütsü tetuyuba agütsür linük toktsür ao. Iba olemtep nung Russia maden ta Russian foreign ministry-i ashi.

"B. Assad aser Syrian Arab Republic nung litsü atema rara nung adener nisung aika tsüngda olemtepba sülen pai president menden nungi anentsü aser linük toktsür aotsü mulunga agizük" ta ministry-i metetdaksü.

Deobarnü telungpurtemi Syria yimtiba Damascus telungi aيتدang Assad-i Damascus toktsür tesem kati ao. Assad, pa kinungsü Asma aser tanur ana kong lir mejangja.



Assad-i küm aika Syria madak yimsü süa aruba anendaksüba sülen Syria nung nisungtemi benjungtep. Parnoki Damascus nung Bashar al-Assad tebu asür Hafez kürazyanglutem raksatsü.

Syria kübok Aleppo nunga nisungtemi Assad tedi Bassel indang kürazyanglu ka raksaja lasü.

Assad tebu Hafez al-Assad-i 1970 coup ka ajanga sorkar yimsü asütsü tenzüker. Pai yimsü asüba mapang Syria nung pa

anema noktakerem dak akangakanga mapa inyak. Iba jaji Syria tesem ajungalen Hafez indang kürazyanglu aser noksatem agi sünga lir.

Syria nung rejutem, office aser school tem nung pa indang noksatem yua lir.

Bashar al-Assad-i 2000 küm tebu Hafez ket nungi sorkar yimsü asütsü tashi ngua lasü. 2011 nungi Bashar-i democracy movement anema mapa inyaktsü tenzüka lasü.

# AKM President-i 'SHISASEN' kaket sayatsü



Shisasen kaket zülur Wb. S. T Yapang (abelen) aser kaket sayatsür AKM tir Wb. Lanu Aier(achijilen) noksa nung angur.

**Mokokchung, Luchii 08:** Ao Kaketshir Mungdang President Lanutoshi Aier-i Rogonü, Luchii 6, 2024 anogo AKM office nung ST Yapang Lkr-i züluba Shisasen kaket sayatsü. Kaket sayatsüba mapang AKM President-i, "Ao oshi nung Kaket zülur ajema akumba khuret lemsatapa laisu. Ao oshi wazüka ayutsü aser renloksü maparen sentong balala inyaka arudagi saka Mokokchung District nung school timba ka nung Ao tesayur malibaji tarutsü atema tetsükdaksü tulu ka

asutsü. Aor-i züluba Kaket temejatem sorkar schools aser colleges nung sayatsüji kanga tongtibang aser iba anogo atema yongyaseta atar. Tanu kaket azüingba putu samaba mapang nung asen Aor lanurtemi Ao oshi nung züluba kaketem meranga azüingtsü aser angazüktsü kanga tongtibang." ta ashi. Kaket züluri, SHISASEN yabo yoka mesenzütsü saka online aser kaket ayokdak dokan nung dang ayoktsü. Metettepa aliba nisung kati

kaket yokyonga arura aikati malinüaka alitsüsa akümer, anungji item timtem nungi asen lima jembua lidaksütsü asoshi mera tasen ya agitsüsa akümer. Lanurtemi pei tetsü oshi sapua azüingtsü tayongzükba nung kaketshir Tir nem sayadaksütsü asüingdanga liasü.

Iba Yimdangjem (fiction) kaket nung otsü trok lir, ibai tanü asen lima tia aser maneni yamaisa lira tarutsü nung ataloktsü akok ta bilembatem, shisatsü tasen angutsüsa aliba otsütem lir, iba jagi kaket tenüngji 'SHISASEN' ta jaloktsü.

Kaket zülurisa, iba kaket menüngdang Jemtimenba Mollier Foundation ajanga senotsü teyari agütsüba atema pelaba shisem. Kaket ya online nunga memenui angutsü aser kaket ayokdak item dokan nung angutsü:

- Kohima.**
1. Crossword, South X Complex Poter Lane, NH-29.
  2. Woodland Handicraft, Opposite State Library.
  3. Made In Nagaland.

- Dimapur.**
1. Modern Book Depot.
  2. Book & Book Centre, Midland.
  3. Christian Literature Centre.

- Mokokchung.**
1. Balaka Yokya, Opp. to New bakery.
  2. Students Book Centre, below Co-Operative Bank.
  3. Classmate, Changtongya Town.
  4. Tzüdir Restaurant, Tuli.

# Kohima district kübok Tsiemekhuma Sub Centre semzükogo

**Dimapur, Luchii/December 08 (TYO):** Tsiemekhuma Sub Centre, Chiephobozou Block, Department of Health & Family Welfare, Kohima semzükba sentong December 7, 2024 nü agia liasü. Iba sentong ya Dr. Leamnye Konyak, CMO Kohima ajanga moatsü, kong Dy.CMO, Dr. Imchatoshi, DVBO/DSO, Dr. Kevilhulie Meyase, DPO (RCH/UIP) Dr. Khrievilhou Nakhro, DPMU, SMO Chiephobozou CHC, MO Botsa PHC & team, BPM aser putu yimsüsürtem dena liasü aser Pastor Peteneilhou Rüpreo

ajanga meshiteta sarasademtsü. Iba sentong ya Dy.CMO Dr. Imchatoshi lenisüba kübok agi, kong village council charimen Mereise-i pela agizükba o jembi, Women Society Tsiemekhuma ajanga sobaliba ken ka aten aser BKK Tsiemekhuma ajanga temeja ken ka tena liasü. Iba sentong nung DPO (RCH/UIP) Dr. Khrievilhou ajanga Universal Immunization programme (UIP) & Non-Communicable Disease (NCD) indang jembi aser DVBO/DSO Dr. Kevilhulie Meyase ajanga vector borne

disease & Climatic change on health system onük nung ajemdaker jembia liasü. Sentong nung CMO, Kohima Dr. Leamnye Konyak ajanga jembidang health centre ajungkettsü asoshi nüburtemi shilem agitsüba ya tongtipangtiba lir, ta ashi. Health Centre semzükba sülen health services tajungtiba nung agütsütsü asoshi nüburtemi ketdangsur den teka amteper inyaksüla, ta pai ashi. Iba sentong nung Dr. Ropfükolhou Dolie MO Botsa PHC ajanga melepzüng o jembia liasü.



Naga Heritage Village, Kisama nung ImagiLAND noksa anünglen nungi tangokba yangi angur. Iba tesem nungya tanurtem kazüdak tesem, sempet sayaba tesem, digital photo booths, aser chiyongtsü tabu balala angur.

# SP Peren ajanga metetdaksür

**Dimapur, Luchii/December 08 (TYO):** Superintendent of Police, Peren ajanga nüburtem dang sangdong ka nung, 'F' Coy 11th NAP (IR) ajanga December 9 & 10, 2024 anogotem Firing Range, Police Reserve Peren nung anepdang 6:30 ako nungi tenzüka

shooting practice alitsü, ta metetdaksü. Anungji Firing Range, Police Reserve Peren anasa aliba yimtsüng ketdangsurtem dang nisung shinga iba tesem anasai maotsü aser shiruru meyoktsü metetdaksür, ta sangdong ajanga ashi.

# Toyota Hornbill Music Festival 2024



Kisama nung Toyota Hornbill Music Festival 2024 tenzükur December 8 nü kentener temi ken atenba noksa nung angur.

**Kohima, Luchii/December 08 (TYO):** 25 buba Hornbill Festival 2024 nung shilem ka ama Kisama nung Toyota Hornbill Music Festival 2024 tenzükur anogo ti nü buba, December 8, 2024 nü NCMFA singers, The Nagaland Madrigal singers, Kithagha Union Baptist Church Choir, Eirene choir, Celestial voices- Bethel Baptist Church Tseminyu,

Welsh musician Gareth Bonello, Abdon Mech aser Ricky Kej nungeri yimya balala nung ken tena liasü. Maneni December 9 nü Gini (Meta), Sejal (Meta), Kivito, Avora Records, The Gluttones aser Mother Jane nungeri shilem agitsü. Concert ya nikongdang 5:00 ako nungi tenzükur Main Arena, Naga Heritage Village Kisama nung alitsü.

# Kisama nung muzzle loading prangbong agi raliwalir puar



**Dimapur, Luchii/December 08 (TYO):** Muzzle loading prangbong khashishiba ya ana aser talang nungi raliwalir asoshi jangratemtsü aketba inyakyim ka kumogo. Iba inyakyim ya akhi tetsü-tebou mapang nungi amshia arur aser Kisama nung tang temungdak Hornbill Festival nunga jangrabangraba maparen ka kumogo.

state alema oa tesem balala nunga ayoker. Parnoki yangluba prangbong ya single barrel sen 8,500 meshir aser double barrel aliba prangbong nung sen 18,000 meshir. Konyak Naga nunger ya prangbong yangluba nung takotet lir. Parnoki prangbong ya komasür yanglu tenzükur mejangja, saka mapang talangka nungi parnoki iba prangbong ya yanglua amshia arur. Akhi mapang item prangbong ya süng aser yinsang tejen amshia yanglua aru.

Mon district kübok Changlangshu yimtsüng nungi Konyak nunger prangbong yanglur ana, K. Moba aser Nyeiba nati prangbong yanglu tenzükur küm 35 jungogo aser Craftscaoe, Kisama nunga dokan amai lapoker akhi mapang nungi prangbong yangluba yimyatem sayur.

Kisama nung lapoka aliba Konyak Morung semdangter temi muzzle loading prangbong khashitetter, anungji nisung aika adenshir. Iba prangbong khen khadokba nung sen 200 agir, anungji raliwalir temi iba prangbong khadoktsü jangrabangra adenshir.

Tenati yangluba prangbong ya tajung ta ajaki meteta lir aser Nagaland kisung masü saka

prangbong khadoktsü jangrabangra adenshir.

**Christmas Book Fair Dimapur 2024**

**OM Books**

**9th - 21st December 2024**  
**Time: 9:30 AM – 5:30 PM**  
**Venue: A.H Road, Opp. Dimapur Sumi Baptist Church, Chakhesang Colony, Dimapur | Mobile: 98620 08081**  
**Sunday Closed**



December 08, 2024 nü Patiala district nung aluyimertemi longkak aita Delhi tsütsüleni aodang Shambhu Border nung police-i parnok dak tear gas khaloktsüba noksa nung angur. Aluyimertemi sorkar nem Minimum Support Price (MSP) densema takhangba balala agütsür.

### Maharashtra election osang ajanga aika jashir: Sharad Pawar

New Delhi, Luchii/ December 08 (Agencies): Tawa Maharashtra assembly election nung opposition-i tamakok anguba sülen Amongnü Nationalist Congress Party (SP) Tir, Sharad Pawar-i Maha Vikas Aghadi (MVA) teloktep nung lenirtem dang, BJP-i aniba Mahayuti-i takok anguba agi aika jashir, anungji nüburtem den amalitepa alitsüla, ta ashi.

Pawar-isa, election mapang nung nangzükba ajak ruling party nem inyakdaksütsüji opposition teinyaksü mapa lir, ta ashi. Ruling party-i Ladki Bahin scheme kübok tetsürtem nem ita shia sen 1,500 agüja aliba nungi sen 2,100 agütsütsü, ta nangzükba liasü.

Election osang ajanga melung mesüi Pawar-i, "Atangji asenoki tamakok mejashitsüla saka nüburtem dangi meyipa aotsüla, kechiyong election osang ajanga nüburtem pelaba majiteter. Nisung aika jashir," ta ashi.

Maharashtra assembly election nung ruling BJP-NCP-Shiv Sena teloktepi menden 288 nungi menden 230 tashi nung takok nguua liasü.

Assembly nung opposition nungi züngsem ishika dang lir,

ajisüaka assembly nung lanurtem dak tashi lir, ta paisa metetdaksü.

Samajwadi Party-i MVA teloktep toktsüba dak sendakba nung Pawar-i, opposition longjema alitsü atema Central lenirtemi inyaktsüla, ta ashi.

Assembly election nung party balalai votes aser menden anguba medemdanga Pawar-i, "Congress-i vote lakh 80 angu saka menden 15 nung dang takok angu, ajisüaka Eknath Shinde-i aniba Shiv Sena-i vote lakh 79 dang nguaka menden 57 nung takok angu," ta ashi.

Iba dak sendakba nung BJP lenir aser Chief Minister Devendra Fadnavis-i, 2019 küm Lok Sabha election nung votes aser menden anguba medemdanga, "BJP-i vote crore 14.9 nguua menden 9 nung talok angu, Congress-i votes crore 9.6 nguua menden 13 nung takok angu, Shiv Sena (UBT)-i votes crore 7.3 nguua menden 7 nung takok angu aser NCP (SP)-i vote crore 5.8 nguua menden 8 nung takok angu," ta metetdaksü.

Paisa, 2019 küm election nung Congress-i vote crore 8.7 nguua menden ka nung dang takok angu aser NCP-i votes 8.3 anguba nungi menden 4 nung takok angu, ta ashi.



December 08, 2024 nü New Delhi nung BJP lenir, Vijay Goel den tangartemi Delhi nung AAP sorkar anema longkak aitdang tangokba noksa nung angur.

### Delhi nung alir shilem 99-i AAP sorkar schemes pusemer: AAP

New Delhi, December 08 (Agencies): Amongnü Aam Aadmi Party (AAP)-i, Delhi nung alirtem shilem 99-i angati electricity, tzü subsidies aser tetsürtem bus nung angati senzüdaksüba ama welfare schemes pusemer, ta metetdaksü.

Sangküm February ita nung Delhi nung assembly election agitsü lia AAP-i nübo ayongdentsü atema 'Revdi Par Charcha' campaign agidar.

AAP-i Delhi Assembly elections nung asemenbuba atonga takok angutsü nükjidong yur nüboyimer. 'Revdi Par Charcha' campaign kübok party-i Delhi tesem ajaklen lokti senden 2,000 ayongzükba agia

AAP indang welfare schemes asadanger, ta AAP-i metetdaksü.

Item ama sentongtem nung Delhi nung alirtem AAP indang welfare schemes agi melung asüba lemsatepogo; item schemes rongnung angati electricity, tzü, shisaliok, healthcare, tetsürtem atema bus aser teintet sensotem temeshi aini yokba densema lir.

"Party nung inyakertemi ashiba agi, Delhi nung alir shilem 99-i item ama schemes maneni aginer aser item ama schemes ajanga parnok libaliro jenjang tajungba kümogo aser kidang sen teindokba kanga ajema kümogo ta shiogo," ta AAP-i metetdaksü.

"Revdi Par Charcha' sentongtem nung adenertemi, item ama schemes ajanga ita shia kibongtem nung sen 6,000 nungi 8,000 tashi kümzükker ta shiogo. Ita shia sen 8,000 nungi 10,000 tashi dang anguba kibongtembo kanga melenshiogo ta shiogo," ta AAP sangdong ajangasa metetdaksü.

"Tawa AAP-i scheme tasen ka sangdongogo: arrshi küm 18 ser temapur tetsür ajak nem ita shia sen meyrjang kaka agütsütsü. Iba ya ajanga tetsürtem nem tashi agütsütsü, anogo shia kidang sen teindokba ajema akümstsü aser tetsür chanutem nem shisaliok agütsüba tsütsü tesükdaksü agentsü," ta AAP-isa metetdaksü.

### Congress-i India-China tesendaktep atema jembitsü akhanger

New Delhi, December 08 (Agencies): Sorkari Parliament nung India-China tesendaktep indang sangdong agütsüba agi melung mesüi Amongnü Congress-i, Modi sorkari 2020 küm April jakdang aliba tejenba tensa dang nungibo tensa tasenba ang agizükker, ta ashi.

Congress-isa Parliament nung India aser China na tsüngda tesendaktep indang o lemteptsü atema temelaba agüjang, ta takhangba agütsü.

Congress general secretary in-charge communications, Jairam Ramesh-i, Parliament nung asalentong aser rongsenkettzüng nung rangloker India-China tesendaktep atema o lemteptsüla, talisa rongsenkettzüng tsütsü asenoki China dak metaloker, iba dak

alia küm pezü tejaklen China-i arrtsü melenshiogo, ta ashi.

Ramesh-i sangdong ka ajanga, tawa Parliament nung External Affairs Minister, S Jaishankar-i "Recent Developments in India's Relations with China" ta ser sangdong agütsüba Congress-i asadangogo, ta metetdaksü.

Ajisüaka tia maka merajemba ajak asüngdangtsü atema Modi sorkari MP tem nem temelaba magütsü, ta paisa metetdaksü.

Mongolbarnü Lok Sabha senden nung External Affairs Minister Jaishankar-i, anüdoklen Ladakh nung sepaitem ajak aienshiogo aser maneni tanungba mangatettep ajak bentettsü atema China den ken o jembi tenzüktsü tebilemba lir, ta metetdakja liasü.



## TIR YIMYIM YIMOBILEM (EDITORIAL)

DIMAPUR TENTONÜ, DECEMBER (LUCHII) 09, 2024

### Senso candidate-i makoker

**T**aoba Nagaland assembly general election nung Koridang Assembly Constituency nungi Chungtia nunger T.Chalukumba-i par yimer yimten telemtetba anema election nung toktepbaja anga pa par yimteni arishi tepiyong Chungtia senso nungi jentok saka ano par yimtenisa pa nem senso temeten meyipa agütsübaaji Aor yimtsüng aser sensosanger ajak asoshi tatishitsü osang tajung ka asütsü. Kasaji, tamalena tanga constituency nunga ataloka lir. Asen lima nung election aru shia, talisa, yimtisangertemi pei sensosanger ajak jadena mungdang lir külen, pei senso mungdangi mulungba nisung ka election nung toktepdaktsütsü shimer. Aji oda, sensosangertem lokti senden lia shimer asünungji, iba nisung dangji "Senso Candidate" ta ajar. Atangji, senso candidate ta asüba ola osüjibo junger, kechiyong ibaji senso ajaki mulunga shimtetba candidate-a ta angateter. Ajisüaka, asen lima mainba, raksaba aser yimsüsürtem agi mulung masüba tebilemstü ajak ya yimtisangertemi senso candidate shima election nung toktepbaja nungi tenzüker. Aji oda, talisa asen lima nungbo assembly election nung tokteptsü atema political party-temi candidate shimer masü saka yimtisangertemi dang pei pei senso candidate shimer asünungji, asen lima nung agiba election ya political party tsüngda masü saka yim o yim na tsüngda toktepbaja election amai ka dang akümer, iba jagi asenok nungdak makaba nung tsükchiteper aser külemi longjemer arok ajungtsü atema terenlok mapa tulu inyaka aotsü melen, pei pei yim among shi nung mapa tilateri inyakba agi tenük sünger mokteper, iba jagi tebokbo masünger. Ano, senso candidate shimba nung tebilemstü kaji, yimti ka nung yimer ajaki mulunga senso candidate shimbaji angati masü, jenjang kanga tasak, anungji shitakba election mapa metenzük dang pei yimer temoatsü agi khuret-ang kümer atar. Aji oda, yimtak shimer asünungji, senso candidate shimbaji Nagaland tatar senden nung pur medemer mulung koka pei lima aser nübertem nungdak jembitsü temsüa ali mali apia masü saka kin kidong aser kimang tulu tila apia shimer. Aji oda, tang amaji sensosangertem rongnung yimten nung shilem aginüa jangrar aser election nung toktepnertem aika pei yimteni nokdang, anungji election-i meitet yimer o yimer na tsüngda tamajung tulu agitepa tsükchiteper. Asenoki süoki ia bilemdangtsü mapa kaji, tanü asenoki senso candidate shimba yimten inyakyim ya akhidang chuba shimba "Monarchy" yimten akümer amai bilema inyaker. Iba jagi asenoki MLA shimba ya chuba shimer amai bilemer aser tadokertemia chuba akümer amai bilemer. Asenok mangatetba agi timtem takoksa angubaji aji ka lir. Ajisüaka, election agiba yabo akhidang kin kidong ka nungi dang chuba akümba yimten inyakyim nung masü saka nübertem asoshi nungdak jembia inyaksütsü aser yimsüsütsü temsüa alirtem rongnung nübertemi mulungba shimtsü asoshi nübertem nem temeten aser maangka agütsüba mapa ka lir. Iba temeten jagi election-i inür ajak aitsü akoker saka shimtsüba tashijibo nübertem nem agütsür, anungji yimten nung tashiyim aser sen amshia kari mulungba shima senso candidate akümstübaaji nokdang. Atangji, asen lima nung senso candidate shima election nung toktepdaktsüba mapa ya tenzüker election aika agia aruogo, anungji asenoki senso candidate shimba mapa ya ajung asü majungar metetogo. Aji oda, asenok ajak longjemer yariba senso candidate tobo pei akaba ajak yokmar sentsütsür kümer timtemseta alitsüa akok. Iba dangji senso candidate ajatsü asü (?) mesüra senso lar ajatsü? Asenok nem linük temzüngi asen sobaliba aser ali rongsen kümsüka ayutsü temeten agüja lir saka asenok nem asen senso rongnungisa süaka tangarbo shinga election nung meidaktsüi asenoki shimba senso candidate dang yoktsübaaji melaa mali. Ibayongji asenok okadak temeten mangur. Atangji, linük temzüngi memelaaka, ozü amongshi nungbo ozü mulung ta Chungtia yimtenia inyaksüa koka lir, ajisüaka tamajung nem masü saka tajung nem kokdaktsübaaji shitakba takok asütsü. Aji oda, tang tashi nung asenok senso candidate-temi akoba takok yabo tamakok danga tamajungba, iba yagi lokti aser senso candidate ajak lurepdagi.

## OLEMSABANG

### CHRISTMAS ASER NEWYEAR BENJONG YA SHI JANGRABA BENJONG KA MEKÜMDAKTSÜLI

~ L. Kika Pongener.

Jokorla küm tembanga arur aser alima yimya mepong ajak agi Benjong ronem menema arur. Kima yimdong ajunga nung benjong subo (Decoration) inoker alima ajunga tobur junga kümogo. Chirnurtem bendang lima tesem balala nung mapa balala inyakerter aser kaketshirtema ajunga pei alidak jila aser yimtsüngi arua pei tsürabur den benjong amongtsü yongyaseta ataba mapang. Aluyimertema alu mapa ajak tema arur joko benjong amongtsü yongya-a renemba mapang. Loktiliba ajunga küm tepiyong teinyaktsü mapatem sentong atonga akaba ajunga inyaka tembanga arur, jokorla benjong amongtsü yongyaseta ataba mapang. Atangji, takar-sensaker, tular-tilar kibongtem ajunga pei pei tashi yari Christmas aser Newyear benjong amongtsü renemshia sentong tapu aika atongtepa yanglua alitsü sudi.

Surabangla, asenok kibongtem ajungai taküm 2024 Christmas & Newyear benjong ya kechi komala yimya ka nung amongtsü renemdar....??? Küm shia asenok Naga nunger Khristan-temi Christmas & Newyear benjong amongba yimya repringadagra.... Takar-tular kibongtem aikati pei kidang 'Decoration' inokba nung sen merijang lir-tenem (Rs. 40-50 thousands) tashia indoka yangluteper. Aji oda, sensaker kibongtem-ia 'Star' kabosa inoker. Aji oda, Christmas mongpo metettsü atema benjong subo (Decoration) inokba yimyaji tamajung masü mapa tajung lir. Ibagi benjong mongpo metetdaksür aser benjong ronem menemdaksür. Tanü putu nung lim arogotema aikati kima-yimdong nung, tenla-kima aser tenla-ki kilung nung sen lakh aika indoka benjong subo 'Decoration' inoker. Atangji, benjong subo inokbaji tamajung masü mapa tajung lir. Ajisuaka, asenok amangbapurtem ajungai angatetsüba kangasa tongtipang kaji....Benjong subo inoka tobur junga renembaji tongtipangba mekümdaktsüsüla....Saka iba dang nungi kanga tongtipangba ka lir....Aser ibaji Yisu Khristai asen mimchir ajunga nem bentsür aruba...Tsüngrem'er angati temeim senpet lir...Ibaji sensaker, mokokmeiner aser timtemertem den lemsateptsübaaji ajak dang tongtipangba sudaktsüsüla.

Küm shia Naga nunger kibongtemi benjong amongba yimya repringadagra....Takar-tulartemi balaka pei ama takar-tular kibongtem nem pei akaba aser pei aküm-sentsüket sayutepa senpet tulu....Cake/shijep tulu-lu agütsütepba, iba sobaliba tentet beshiba angur. Iba ama senpetji küm shia kibongtem tsüngda nung melentepa agütsütepba angur. Ajisuaka, takar-tular kibong aikati sensaker, mokokmeiner, tantsü-tambur, leni-maor aser lajar item kibongtem dang temeim mapa inyaksübo mebilemteter. Jila aser yimtsüng aika nung kangasa tepetzük sensakpo kibongtem, chirnur teyarir mali tantsü-tambur, leni-maor, tsürabur mali lajar, yamala kibong karbo benjong mapang nung jang tesorotsü maka, shi kg-1 danga alitsü sen maka, ano kibong karbo Kombol su (Blanket) ka malitet asükba agi aonung amoua mooteter....Yamala timtemer tepetzük kibong aika lir. Aji oda, takar-tular kibongtem nem pei takaba aser aküm-sentsüket sayutepa senpet agütsüteptsü melenbo....Sensaker/timtemer kibong kar nem-ang senpet tula-ka agütsüba-ang kanga agi temoatsü tuluba asütsü. Anungji Christmas & Newyear benjong ya pei takaba aser pei sentsüket sayutepba benjong ka masü, saka Yisu-i bentsür aruba temeim senpet sensaker/timtemer den lemsatepba benjong ka sudaktsüdi.

Ano kangasa tesusatsüka, asen Naga nunger kijung-lanur, kiyim-lanur aser aiur-asangurtem aikati Christmas & Newyear ya shi-azü jangraba benjong ka ama kümdaktsür. Lanurtem aser aiur-asangur aikati benjong mapang pur-medemertem den longsotepa, Rum, Whisky, Beer, Drugs chia-jemtepa, amang piyong, oda anepdang züngia tashi tsüngsangtepa longsotepa benjongteper. Carol aoba mapang nunga karbo nuktapangda japojaru mapatem masüngtei inyakteper. Kangasa tesusatsüka, Christmas & Newyear benjong agi shi-azü jangraba benjong-ang ka kümdaktsür. Aji oda, iba ama chia-jemtepa longsotepa benjongtepdang Gari accident lendong aika ataloker aser kibong aika nung benjong mapang 'Funeral Service'-ang agitsüsa atalokba tensa mapang aiben ajurur. Ano Christmas aser Newyear benjong tsüngda nung lanurtem aser aiur-asangurtem aikati ayongi 'Picnic' aor aser iba mapang machi-majemtsü chia-jemteper longsotepa pelatepdang, tia maka karbo tzü agi ponger oa arakseta taküma dena samaba aiben ajurur.

Ano ajak dak alaka, kangasa tobur majung kaji....Benjong mapang lanurtem, aiur-sangurtem aser tanürtem aikati aser oda taintema karibo limapur Hindu nunger Diwali & Durga-Puja benjong mesuka, bomb poktepbaja angudang kangasa sungmanga repringer....!!! Hindu nungertemi Diwali benjong mapang bomb poktepbaja ya par sobaliba aser tamangba yimsu den sendaktepba tongtipang mapa ka lir. Ajisuaka, Khristan-temi Christmas & Newyear benjong mapang Hindu nunger limapur yimsuji ajizüka bomb tesungmangtsüka pokteper. Iba ya asen sobaliba aser tamangba Chistian yimsu den khenyongi mapetba mapa ka lir. Talisa, 31st December aonung küm tejen aser tasen melentepba mapang shitak nungi tenzüka bomb ya kanga sashia pokteper. Atangji, iba ya Hindu nunger limapur yimsu ajizüka beshiba mapa ka lir. Anungji taküm 2024 Christmas & Newyear benjong yabo shi jangraba benjong ka masü....Saka Yisu-i mimchir ajak nem bentsür aruba Tsüngrem'er angadi senpet lemsatepba benjong ka aser tejen taküm melenshir taküm tasen akümba benjong dang sudaktsüdi ta iba osangkaket azünger ajak dang ayongzüker.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## Kisama nung Advent Khristmas devotional service agi



December 08, 2024 nü Naga Heritage Village, Kisama nung Advent Christmas Devotional Service nung Chief Minister, Neiphiu Rio den Minister tem, Advisors aser Arogo lenirtem adenba noksa nung angur.

**Kohima, Luchii/December 08 (TYO):** Amongnü, December 08, 2024 nü Naga Heritage Village, Kisama nung Advent Christmas Devotional Service agi.

Iba sentong ya Nagaland Joint Christian Forum (NJCF)-i ayongzük aser tetushi tejaokerji Nagaland Chief Minister Neiphiu Rio liasü.

Iba sentong nung jembidang Chief Minister-i Kisama nung par kibonga Advent Christmas sentong nung dentetba atema pelaba lemsatsep.

Paisa, iba sentong ya 25buba Hornbill Festival nung külemi tang mezüng ayongzuka agir, ta ashi.

Chief Minister Rio-isa Nagaland Joint Christian Forum-i Kisama nung devotional service ayongzükba atema pelaba lemsatsep.

Iba sentong nung adenertem dang pai, Hornbill benjung ya Khristmas tanela iladaksütsü atema masü saka tanela maitüsü, lisopur senmang aser yimtenren maitüsü sendakteptsü atema lir, ta metetdaksü.

Chief Minister-isa shilem agirtem dang tan mongpu nung chichiba Khristan ka ama aremzükteptsü, tai tokteptsü aser tajung benshitsu ayongzük.

Paisa ajak dang Khristmas tetezü tiyongtsü- teimla, tesünap aser tekümtet bener arutsüsang Yisu Khrista dak rangloksü ayongzük.

Tsüngrem O jembidang NJCF Advisor, Rev. Dr. Zelhoul Keyho-i, Khristmas mongpuji Yisu Khrista asoba atema benjungtsü asoshi lir, ta ashi.

Rev. Dr. Keyho-isa nija

tayongzükba balala liaka chichiba Khristmas nung rangloksüla; iba mongpu ya Khristan tamang jenjang sayatsü aser Tsüngrem sentsüwangshidaksütsü atema maongka anguba mapang lir, ta ashi.

Paisa, Khristmas ya Santa Claus indang masü saka nüburttem den Tsüngrem adenba indang lir, ta metetdaksü.

Sentong tenezüka NJCF Joint Secretary, Rev. Fr. Dr. George Rino-i sarasadem aser NJCF Tir Rev. Dr. N. Paphino-i lokti pelaa agizükba o jembia liasü.

Kasa sentong nung Sumi Aphuyemi Baptist Church (Kohima), Nagaland Chamber Choir, Khedi Baptist Church (Kohima Village) aser Live Voice (CRC Viswema)-i ken ajanga shilem agia liasü.

## North Korea nung Khristantem kanga reshikangshir: ACN

**December 08, 2024:** North Korea nungi jena oa China nung jenokba Khristantem tanaben North Korean political prisoner camps-i yoker, ta yimsü temeden atema inyakba foundation- Aid to the Church in Need (ACN)-i metetdaksü.

Tan ita Red Week mapang nung ACN-i 'Persecuted and Forgotten? A Report on Christians oppressed for their Faith 2022-24' sangdonga liasü.

Alima tesem balala nung Khristantem reshikangshiba tensa alima nem metetdaksütsü atema ACN-i iba report sangdong.

2024 report nung ACN-i North Korea densema linük 18 nung tensa metetdakja lir.

ACN-i, "North Korea ya communist linük ka lir aser 1948 küm nungi Kim dynasty-i iba linük yimsüsür. North Korea nung Khristantem alitsü kanga tasak. Iba linük nung nüsüng shilem 0.38 shi dang Khristantem lir (nisung 98,000 dang Khristan)," ta metetdaksü.

Iba linük nung tamanger

ishika dang liaka Khristantem miimshia amangtsüsa akümer.

Korean Broadcasting System (KBS)-i ashiba agi, North Korea nung nüsüng ajak Marxist tangatetba 'Juche' sülen anidakdaksür.

North Korea nungi jena aoertemi China den arrtsü mile 880 ajanga jena aoer. Parnoki security sepaitem ajanga jena otetra arrtsü tasembuba adena aotsüsa akümtsü. Parnok teimbakati Thailand-i aoer aser South Korean embassy dang parnok jenoktsü atema asüngdang. Iba sülen South Korea nung jenokdaksür.

Ajisüaka North Korea nungi jena arurtemji China ketdangsertemi pura North Korea-i tanaben meyipa yoker.

Human Rights Watch-i ashiba agi, taküm April ita kija nunga China sorkar ketdangsertemi North Korea nung 60 shi North Korea-i meyipa yokogo.

North Korea-i tanaben meyipa yokertemji North Korean political prisoner camps nung puoker aser yangji

reshikangshir.

ACN-i, alima nung Khristantem atema linük tamajungtibaji North Korea lir; linük meimba nung ajemdaker nüburttem junga züngshir saka tamangertembo reshikangshir, ta metetdaksü.

Taküm August ita nung United States Commission on International Religious Freedom (USCIRF)-ia report ka ajanga North Korea nung Khristantem reshikangshiba maparen nung China-i yaritepba metetdakja liasü.

USCIRF sangdong ajanga, "China nung jenoka aliba North

Korea nung refugees tanaben North Korea-i yoktsü atema China sorkari maneni North Korea den yariteper. North Korea-i tanaben yokra parnok reshikangshitsu mesüra temerenshi tulu angutsü, ta metetsümonga Khristan maparen nung shilem agirtem aser Khristan missionary tem den tongtepratepa alir Khristantem aika North Korea-i meyipa yoker," ta metetdaksü.

## ANOGO ABEN TSÜNGREM DEN

### Asenok tsükchir dang inyakba Mathi 4: 1-11

Asenoki zübazüba agiba mesüra mapang-mapang nung Satan tsütsü bilemba yimya paidoktsüla. Meimchiri ajangshiba ajak nung Khristan ka asoshi Yisui bilemba aser mapaji tabensa ta bilemstsüla. Anungji Pai tsükchir dang inyakba asenoki zünga alitsüla.

Mapa kaji, Satanji shidakba lir ta Yisui kümdanga liasü. Pai tamajungji temulung nung bilemba temenen ka dang sayutsü kodanga memerang. Asenoki taküm nung takok ngunera, asenoki Yisu ama tajung tashi kobai Tsüngrem den tesendaktep raksatsütsü meranger aser asenoki asen kümzüksang tenzüksü merangba menentsür, iba tashi tamajung aliba meteta notaktsüla.

Jangjajangjaa, Yisui Satan arütsü aser Pa taküm nungi oadokang ta ozüng agütsü. Masterbai asenok asoshi kasaji inyaktsü. Satan tekülak aser pa tasa tamajung asen tebilemba dangi aruba metettangyongi, asenoki Michael Archangeli sangdongba tashi tait tesangdongba sangdongtsüla - saka kotak tenyar tuluba Michaeli... Tsüngremi na arüjang (Yihuda t.9).

Sarasadem: O Israel Sannüker, na shiba Cherubim madak amener, sentsüwangshiang. T.Ken 80:1.

Saka nenok Kü tenüng akhümtsüburtem asoshi temeshiba anü Pa tashikang nung tanebtsü bener adoktsü. Malaki 4:2.

## Notre Dame Tenla ki tasenba nung tang mezüng tekülem sentong agi

**December 08, 2024:** Küm pongu tejaklen France yimtiba, Paris nung aliba Notre Dame Tenla ki rongdokba sülen iba Tenla ki tasen süshio go aser tang mezüng Amongnü tekülem sentong agiogo.

2019 küm Paris yimti nung nüngshi kiojen rongdoka liasü saka iba Tenla ki tasenba yanglushiba sülen tekülem sentong agiogo.

Paris Archbishop, Laurent Ulrich leniba nung iba Tenla ki semzük aser iba sentong nung Bishop 150 aser putir 100 dak tali dena liasü.

Kasa sentong nung France Tir, Emmanuel Macron-a aden.

Archbishop leniba nung sarasadem sentong agi aser Tenla kidang sabang tasenba meshiteta liasü.

Iba sentong nung jembidang Ulrich-i, "Nenok iba Tenla kidang liaka mesüra TV/phone screen ajanga iba Tenla kidang liaka mesüra tzunglu ajaa liaka ni nenok ajak pelaa agizüker," ta metetdaksü.

Tang France nung yimtenren tensa makmakshishiba dak sendakba nung pai, "Linük tarutsü tiaji shisabulutsüsa lir, anungji ni linük atemaa sarasademtsüogo," ta ashi.

Amongnü nikongdang 6:30 ako nunga tekülem sentong ka agi aser iba sentong nungji temelunger ajak dendaktsü. Iba tekülem sentong nung adentsü atema tan hopta nisung 2,500 nem angati tickets agüja liasü.

Notre Dame Tenla ki ya online reservation system ajanga December 16 nü public nem lapoktsütsü.

Honibarnü iba Tenla ki tanaben semzükba sentong nung US Tir shima alisang Donald Trump-a densema liasü.

2019 küm nungi tenezüka iba Tenla ki süshiba atema pelaba lemsatapa France Tir Macron-i, "Linük tului kechi inyakteterar asenoki jangjaogo, tamakoktsüa koktetogo," ta ashi.

2019 küm April ita nung Notre Tenla ki arong saka firefighters-i tzü agi indangba ajanga Tenla kibo mechirepi liasü.

Notre Dame Tenla ki süshiba nung Euro sen million 700 shi indokogo.

Iba Tenla ki marongdang küm shia nisung million 12-i iba Tenla ki semdanga liasü. Tang iba Tenla ki tasenba süshiba sülenbo küm nisung nisung million 14-15-i semdangtsü imlar.

AO OSHI ANGAZÜKDAK:

TANÜ ANGAZÜKTSÜBA OJANG

Tatatsü (n) aon asodang tzü jaa matudaktsüsu atema polang nung am lemokba (leaf placed on bottom of pot to prevent boiling over) \* Onoki manü ametdang teti tatatsü enoker ameter. Tatayuyu (adv) temulung nung tsübua aser rataa bilemba ( feeling worried, scared) \*Lendong ataloker kinungertem tatayuyu mesüdaktsüsu atema osang yakta shioktsüla.

OLONG PAITEP # 7006

15x15 grid with numbers 1-16 placed in various cells.

TIPIEN

- 2. Auo nung chiyongtsü asenba - (7)
5. Mangyimba mapang - (5)
7. O tamendakdak - (4)
8. Pei dak malangba - (7)
10. Juli - (7)
12. Sen ayudak - (7)
14. Tenük agi ajitet - (4)
15. Tamajung aküm - (5)
16. Apuso - (7)

LANGTSÜNGLEN

- 1. Lenmang - (7)
2. Aor kidong ka tenüng - (6)
3. Tenarong maten - (6)
4. A \_ \_ \_ g - (3)
6. Mopung apodoka - (3)
9. Tonglipang tagitsü - (7)
10. Menungra bilem - (6)
11. Aiür - (6)
13. S \_ \_ \_ k - (3)
14. T \_ \_ \_ r - (3)

OLONG PAITEP # 7005 TELANGZÜBA

TIPIEN :

- 2. Pongsen, 5. Lepko, 7. Omen,
8. Maangka, 10. Yangkhu,
12. Senpong, 14. Angu,
15. Raksa, 16. Arameso,

LANGTSÜNGLEN :

- 1. Alimang, 2. Pongen,
3. Samaru, 4. Nün, 6. Pio,
9. Nüngdak, 10. Yongya,
11. Kongro, 13. Ora, 14. Ata.

NAI-A YA METETTER MA



December 6, 2024 nü Maaya Convention Center, Hyderabad nung Harleys India Fine Baking Company-i alima nung Russian Medovik Honey Cake tulutiba yangluba ajanga Guinness Book of Records nung züluogo. Iba sentong nung Guinness World Records teshimtet nübotem- Rishinath aser Nikhil Shukla na aden aser tenati Harleys India Fine Baking Company CEO Suresh Nayak nem kulikaket agütsü. Nisung 500 temai feet 7 temelem aser feet 70 talang Russian Medovik Honey Cake ka yanglu. Iba cake indang touzükji seret 2,254 liasü aser Rs. 25 lakh endoka yanglu. Harleys India Fine Baking Company-i iba cake ya otsü tasen ka atema dang masü saka lajartem, sorkar school nung azüngertem aser tangar memeneper nem agütsüsu tebilemba lir.

Assam sorkari nashishi noktangba magizüker: Meghalaya BJP MLA

Shillong, December 8, 2024 (Agencies): Assam sorkari nashishi noktangba magizüker ta Meghalaya nung BJP MLA Sanbor Shullai-i metetdaksüogo.

Pa ali tashibo Meghalaya nung ibala mapa meinyakdaksüsu ta Shullai-i metetdaksüogo.

"Ni taküm ali tashi Meghalaya nung nashishi menokdangtsü. Ni Meghalaya sobaliba aser chiyungtsü nung talenba kecha maliba kümzüka ayutsü" ta pai ashi.

"Meghalaya nung alirtemi nashishi, per, scorpions mesüra insects achitsü temeten lir. Constitution-i iba nüjiso agüsür aser ibala tenokdangba agütsüba ni khukhua aitsür.

Meghalaya ya independent state ka lir aser ibala tenokdangba magizüksü" ta Shullai-isa ashi.

"Christmas tonga arur aser asenoki benjungtsüla aser kechi chinür achitsüla" ta paisa ashi.

BJP MLA Shullai-isa Centre aser Assam sorkartem dangi pa tebilemba metetdaksüogo.

Assam sorkari December 4, 2024 nü Assam Cattle Preservation Act, 2021 yanglushitsü lemtetba sülen Shullai-i iba osang metetdaksü.

Assam sorkari Act yanglushiba ajanga state ajungalen public tesem, restaurants, aser hotels nung nashishi ayokba aser achiba noktanger.

Assam Cattle Preservation

Act ajanga nashi tepsetba aser Hindu, Jain, o Sikh nunger teimba ser alidak nashishi mayoktsü tenokdangba agüja lir. Iba Act ajangasa Assam nung temples mesüra satras meketa kilometer 5 telongtet nung nashishi mayoktsü ozüng agütsür.

Lokti nung teputep tali adoktsü aser akhümtsübutepstü atema iba lemtet agi ta Assam Chief Minister Himanta Biswa Sarma-i sorkar lemtet metena metetdaksüogo. Ajisüaka, MLA Shullai ama yimtenren lennirtemi anir kija aser telok balalai iba lemtet aitsür.

Iba ya sobaliba aser kija temeten anema lir ta parnokki ashir.

Human Rights Day nung Manipur civil society teloktemi sentong agitsü

Imphal, December 8, 2024 (Agencies): Manipur kübok Imphal Valley nung All Manipur United Clubs Organisation (AMUCO)-i anir telok pungui December 10 nü lokti sentong tulu ka ayonga agitsü metetdaksüogo.

Civil society organizations (CSOs)-i Armed Forces Special Powers Act (AFSPA) anema lungkak aittsü aser state nung yimjung meshitsü.

December 10 ya kümshia International Human Rights Day amonger aser Manipur teloktemi iba anogo nung

lungkak aittsü shimtetogo.

"International Human Rights Day nung onoki AFSPA tanaben benokba anema lungkak aittsü aser Manipur nung tensa süngjemdaksütsü atema takhangba agütsütsü" ta Convenor Pratap Leishangthem-i ashi.

Külen, Imphal Valley nung civil society organizations aser kaketshir telok 20 shi kati December 22 nü Delhi nung sentong ka agitsü osang metetdaksüogo.

Manipur nung mangatettep

adoka aliba atema putepshitsü tayongzüka agüja parnokki iba sentong agitsü.

Committee of Peaceful Coexistence Manipur, Federal Students Organisation Kangleipak, Manipuri Students Federation, aser Imagi Meira dena teloktemi züngsem 50 adenba telok ka shimtsü metetdaksüogo.

Iba teshimtet teloki Prime Minister Narendra Modi den ajuruteptsü aser parnok tebilemstü aser takhangba onüktem lemsateptsü tebilemba lir.

Bangladeshi nunger nem medical services magütsütsü mepir

Guwahati, December 8, 2024 (Agencies): Assam nung socio-cultural organization- Jai Radhe Seva Samiti ajanga nija mozü kitem, doctor clinics aser medical professionals ajak dang Bangladeshi nunger meyaritsü metetdaksüogo.

Bangladesh nungi nisungtem aruba atema tebilemstü abener. Parnoki India nung linük anema mapa inyaker aser par linük nung minorities reshikangshir ta Jai Radhe Seva Samiti tanishir

kati ashi.

Ibala nisungtem nem medical treatment magütsütsüla aser reshikangshir tia ajururtem akokba tashi yaritsüla ta parnokki ashi.

Assam sorkari sorkar mozü ki ajak nung Bangladeshi nunger nem medical services magütsütsü atema mapa inyaksü ayongzüker ta Samiti-i metetdaksü.

Taoba nung Assam kübok Barak Valley nung aliba hotel

tem nung Bangladesh nunger manenzükdaktsütsü metetdaksüogo. Bangladesh nung Hindu aser tanga minorities amakba manen tashi iba ya alitsü ta hotel kiburtemi ashi.

Bangladesh nung minorities reshikangshiba aser Hindu monk Chinmaya Krishna Das apuba anema Barak Valley nung district asemprong nung nisungtemi lungkak aita arur.

Manipur police, CRPF, & AR-i prangpong-injang aika angu

Imphal, December 8, 2024 (Agencies): Manipur police, CRPF, aser Assam Rifles sepaitemi Thoubal district kübok Pechi Chinglak tenemtsünglen telungpur teseptem mita ao.

Hokolbarnep 6:00 ako meta joint operation agidang Pechi Chinglak nung culvert ka tsünglanglen prangpong-injang aika angu.

Parnoki iba tesem nung SMG carbine, hand grenades, tube launchers, live rounds, 9 mm magazines, bayonet, arming rings, aser Baofeng radio ngutet.

December 5 nü kasa telokisa mita aodang Fungei Ching Ngamukhong nung prangpong-injang aika nguteta liasü.



Iba mapang parnokki SLR, SMG Carbine, 12-bore double-barrel gun, 9 mm Pistol, .32 mm Pistol, Grenades, Detonators, live ammunition rounds, aser Walkie Talkie (Baofeng) nguteta liasü.

Maneni NH-37 nung essential items abenba gari 244 aser NH-2 nung gari 296 tashi

timtem kecha melii senzüogo. Lendong ataloktsü ana nung aliba tesem ajak nung security maparen akangshia lir aser tesem kar nung security convoys ajanga garitem meiner. Manipur kübok hills aser valleys district balala nung checkpoints 106 lapoka lir.

OFFICE OF THE PRINCIPAL  
CLARK MEMORIAL HIGHER SECONDARY SCHOOL, IMPUR  
**SITUATION VACANT**

1. GT (English) - 1 Post  
Requisite qualification –Graduate with English Honours or MA in English with B.Ed from a recognized university.
2. UGT (AO) - 1 Post  
Requisite qualification 12+ & above with PSTE/D.El.Ed and a graduate in Arangtet from a recognized university.
3. Warden (Female) - 1 Post For Junior Hostel  
Requisite Qualification- Graduate in Arts/Science/Commerce/Theology (B.D. or equivalent) from a recognized University.  
Interested candidates fulfilling the requisite qualification only may submit their complete Bio-Data through the school mail provided, on or before 15th January 2025 addressed to Principal CMHSS, Impur. Date of interview will be intimated personally through email.  
Email: cmhssimpur1895@gmail.com

Sd/  
(CHUBAINLA)  
Principal  
CMHSS, Impur

### ALI AYOKER

Doyapur atuba lenmang nung Diezepi aser Ura na tsungda alumang tuluka jenjang dalang agi lepsaa ayoker .

Direct Contact : 9612846178 / 8837273643

## Syria opposition forces-i Tir Bashar al-Assad atsüngdokogo



Bashar al-Assad

**Damascus, Luchii/ December 08 (Agencies):** Syria linük tesem ajungalen kanga kera tesem balala agiyonga arur linük yimtiba Damascus telungi aiter ghonda ishika lir Tir Bashar al-Assad-i küm 24 yimsü süa aruba tembangogo, ta opposition forces-i sangdongogo.

Deobarnü Syrian national television nung live sayuba sangdong ka nung sepai telok kati ‘tazüokba maliba yimsüsür al-Assad yimli chirepogo’ aser Damascus nung aliba tsüngden chiokdak tuluka nungi tepuokdak alir ajak chiokogo, ta ashi.

“Damascus yimti talenba nungi salaogo. Tazüokba maliba yimsüsür Bashar al-Assad yimli chirepogo, Damascus nung aliba tepuokdak nungi nisung ajak chiokogo,” ta iba telok indang lenir kati ashi.

“Asen sepai aser nübür temi Syria linük indang ki o jen wazüka aser anepalua amshitsü imlar. Long live Syria,” ta pai ashi.

Opposition temi ashiba agi al-Assad ya linük yimtiba nungi jena ogo aser pa kong aliar memetet. Al-Assad’er kibongi Syria nung küm 50 dak tema yimsü süa arua liasü.

Video sangdong ka nung Syrian Ato Kilonser Mohammad Ghazi al-Jalali-ia opposition den yariteptsü aser

transitional government atema inyaksü renema lir ta ashi.

“Ni ozü kidang lir aser ni mainshi, aser ibai kü linük asüba yong lir,” ta al-Jalili-i video sangdong nung ashi. Pa maneni mapa inyaksü atema anepdang office-i aotsü ta ashi aser Syrian nübürtem dang ki o jen meraksatsü ayongzük.

Kasa mapang raraba telok tongtiba Hayat Tahrir al-Sham tekolakba Abu Mohamed al-Julani-ia opposition fighters dang public institutions aser services mamaksü totuyuba agütsü.

Opposition fighters tem Damascus nung tir aliba ki telungi aiba aser nübürtemi tir indang noksa agizükba nguogo.

Deobarnep opposition fighters tem linük yimtiba tiyongi oa mangyangba maliba putu ka tenzüker ta sangdong aser bendang lima nung prokshia aliba Syria nungertema meyiba shilangtsü ayongzüka liasü. Opposition forces yagu Aleppo aser Hama yimtittem amokbangogo aser south tsütsüa tesem tuluka agia lir, koba November 27 nungi kanga kera agiyonga ao.

Syrian political opposition coalition overseas tekolak Hadi al-Bahra-ia Damascus nung al-Assad mali ta sangdong aser Syrian nübür nem tenüngsang agütsü.

Opposition fighter temi Damascus north tsütsü Sednaya Prison nung puoka alirtem chiok aser danga yimtittem nunga parnoki yamaji inyaka liasü.

Linük yimtiba nung nübürtem pelatepba “Freedom! Freedom!” ta ayimtena liasü.

Syria nung iba rara ya 2011 küm March ita al-Assad anema nok-nü mebeni tenzüker, saka bendanger tashi densema rara tesashi kuma nisung meyirijang aika tepset aser million aika refugee kumdaksü.

## South Korea Tir Yoon Suk Yeol mapa nungi manentsütet



Yoon Suk Yeol

**Seoul, Luchii/December 08 (Agencies):** South Korea Tir Yoon Suk Yeol-i mapang tatsüka atema martial law sangdongba mechi Honibarnü pa mapa nungi anentsütsü atema vote agitepdang par rulong party-i shilem magiba mechi pa manentsütet.

Yoon-i par linük aser alima aoksaja Mongulbar aonung civilian-i yimsü asüba khen atema anentsü aser sepaitem parliament-i yok, saka ozüng yanglur temi pa indang ozüng songtemtsü.

Opposition party temi impeachment motion ya benok, koba agizüktsü atema parliament züngsem shilem

asem lemsar shilem ana nüngdaka liasü, saka Yoon’er People Power Party (PPP) nungi ozüng yanglur timbai iba vote nung shilem magiba yong tamakok ajuru.

“Vote agütsüba züngsemtem züngdangba nung nüngdakba ama two-thirds majority matong, anungji impeachment vote ya metemsü,” ta National Assembly speaker Woo Won-shik-i ashi.

Linük aser alimai repranga liasü, iba ama linük asoshi tongtipang ken o nung vote magiteptetba ya tesasatsüka lir, ta pai ashi.

Iba yagi ruling party tsütsü

democratic inyakyim nung shilem magiba sayur, ta ashi.

Telemsa aser rongrong madokdaksütsü mechi impeachment nokdang aser yimya tajungba nung mangatettep aliba bentettsü, ta PPP ajanga ashi.

Iba ya Yoon atsüngdoktsü asoshi khanga parliament kima longkak aita aliba nisung 150,000 asoshi tezüdangtsü mapang liasü.

Ruling party nungi ozüng yanglurtem chamber nungi ayazüka aodang longkak aiter temi poloktsü aser karbo jepa liasü.

Opposition temi ano Bodhbarnüa merangtsü nangzüka lir aser longkak aiter aikati ano taruba hopta tatemlena maneni longkak aittsü ta ashir.

“Ni kechi südir süaka Yoon Suk Yeol anentsütsü, shiba South Korea asoshi timtem tulutiba kumogo,” ta opposition lenir Lee Jae-myung-i ashi.

Vote magidang arishi küm 63 tain Yoon-i mepetmesü atema tatok meshi saka pa tia asoshi telemtetba agütsü par party dak keta lir ta shia liasü.

## US mitkari Ukraine nem sen \$988 million alang teyari agütsütsü

**Washington, Luchii/ December 8 (Agencies):** Secretary of Defense Lloyd Austin-i sangdong ka ajanga United States-i, Ukraine nem ano USD billion ka shi alang military teyari talila agütsütsü, ta shiogo. Russia-i Ukraine amakba nokdangtsü atema iba teyari agütsütsü.

Honibarnü iba teyari agütsütsü telemtetba agiba sangdongba mapang Austin-i, taruba US President-elect Donald Trump indang administration dak rangloker jembia liasü.

“Tashi yakta belenzüka agütsütsü. Iba sülen tangari telemtetba agütsü aser onoki taoba küm pezü tsüngda tesendaktep yanglur alibattem parnoki tashi taitba kuma yanglushitsü imlar,” ta Austin-i ashi.

December 2 nü military teyari million 725 agütsütsü nangzükba sülen tang ano USD million 988 alang teyari agütsütsü sangdongogo.

Tang teyari agütsütsü sangdongba nung drone tem aser High Mobility Artillery Rocket Systems (HIMARs) atema injang densema lir, koba US-i taoba mapang agütsüogo.

2022 küm February ita nungi Russia Ukraine amak tenzüka sülen US-i Ukraine nem USD billion 62 alang military teyari agütsüogo.

Ajisüaka tir Joe Biden-i aniba administration yimsüsüba tatemtang kati aruba mapang tang aritepa Ukraine nem

senotsü teyari aser tanga supply tem agütsüdar.

Trump yimsüsüba nung US-i Ukraine maneni yaritsü meyaritsü mejangja. Trump-i, Ukraine rara atema teyari agütsü aliba agütsü aser NATO densema tang military alliance tem nungi atsüngintsü amokmerenogo.

California nung Ronald Reagan Presidential Library nung national security ketdangsurtem senden nung o jembiba mapang, Austin-i tarutsü mejangjaba indang tatsüka jembia liasü.

“Iba administration yagi kechi inyaksü aji shimogo. Aser yamaji Congress nung bipartisan coalition-ia inyakogo. Taruba administration-ia kechi inyaksü aji shimtsü,” ta Austin-i ashi.

Paisa, Reagan shiba Republican ka liasü, pai Ukraine, America nunger security aser meimchir nüjiso atema nokdaker lila, ta ashi.

Biden administration-i, Congress nungi temelaba magi-i tir tashi amshia US stockpiles nungi defence oset talila agizüka Ukraine nem agütsü arudar

Tiri pa tashi amshia intoktetsü aliba sen ano USD billion 6 shi anunga lir.

Ajisüaka Honibarnü USD million 988 teyari agütsütsü sangdongba ya Ukraine Security Assistance Initiative (USAI) nung billion 2.21 anunga aliba nungi agütsütsü, koba ajanga prangbong injang aser military hadirtem alitsü atema

temelaba agütsür.

USAI ya Ukraine nem parnok military tashi ajungkettsü atema longer-term weapons systems agütsütsü atema benokba lir.

Kasa mapang nung Trump-i Ukraine tir Volodymyr Zelenskyy den Honibarnü mapang tatsüka atema senden mena liasü.

Tenaprongla Notre Dame cathedral lapokshiba sentong nung adentsü atema Paris, France-i oa liasü.

Taküm küm tetenzüklen Savannah, Georgia nung nüböyimba mapang Trump-i, US nungi military teyari aika meshia agiba atema Zelenskyy anema jembia pa ya alima nung salesman tulutiba lir ta ashi.

“Zelenskyy United States-i aruba shia USD billion 100bo bener aoer,” ta Trump-i ashi.

Pai, Ukraine ken o nung US mezüpelangdaksüba atema Biden aser Vice President Kamala Harris na aija liasü.

“Ni Ukraine nung rara anendaksütsü aser Middle East nunga mepetmesü adoker aliba tembangdaksütsü. Biden aser Kamala nati asenok Ukraine rara nung densemdaksü aser tang asenok matokteti lir,” ta Trump-i ashi.

Paisa, “ni tir mekümra asenok iba rara nung asonger dang alitsü,” ta ashi.

Trump-i, term anabuba US tir mapa abenba mapanga “America First” policy benoktsü sentong aliba jangja jangja metetdaksüogo.

## Australia vs India: Australia-i tanabuba test wicket 10 agi kokogo



**Luchii/December 8, 2024 (Agencies):** India aser Australia na Adelaide Oval nung tanabuba Test asaya Australia-i wicket 10 agi ayong ayonga koka iba asayamung nung asaya pongu asayatsü aliba kaka kokogo. Asaya nung Pat Cummins-i wicket pongu agia par team nem teyari tulu agüja liasü.

Australia captain yagi run 57 agütsür wicket 5 agia India nung lower order tem nem timtem agüja liasü. Tanabuba Innings nung India team-i run 175 dang yanglua parnok run 18 agi dang Australia dang nungi timba liasü.

India team-i wicket 5 out sür run 128 yanglur lia Deobarnü asaya tenzük, aser team jenjang yanglushia run telongjunga yanglutsü atema Rishabh Pant-i sayatenya ka inyaksü nungdaka liasü.

Ajisüaka Mitchell Starc-i ball

aonba mapang Pant (28) ya slip nung catch out süja liasü.

Iba sülen Cummins-i short ball tasa kanga junga amshia India nung lower order batter tem nem timtem agüja liasü.

Ravichandran Ashwin (7) pull shot ka asayaba mapang catch out asü aser Harshit Rana (0)-a backward point nung catch out süa liasü.

India nung asayartem rongnungi Nitish Reddy-i run timba yanglua pai ball 47 nung run 42 yanglu, ajisüaka pa-a Cummins-i out süja liasü.

India nung asayartem rongnungi Mohammed Siraj tatemsa out süa liasü. Scott Boland-i ball aonba mapang Siraj out sütsü. Boland shiba Josh Hazlewood melena asaya liasü, pai run 51 agütsür wicket 3 agia liasü.

India nung batter kati danga innings ana nung run 50 adena meyanglutet.

Asaya akoktsü atema run 19 dang nungdaka Australia nung tanabuba innings tenzük, aser Nathan McSweeney (10 not out) aser Usman Khawaja (12 not out) nati over 3.2 nung iba run yanglua Australia-i asaya akok.

India team-i mezüngbuba innings nung run 180 dang yanglutet. Mezüngbuba innings nung Starc-i run 48 agütsür wicket 6 agi. Australia nung mezüngbuba innings nung Travis Head-i ball 141 nung run 140 yanglua team nem teyari tulu agütsü aser parnoki ajak senteper run 337 yanglua run 157 agi parnok tejakdang aküm.

Team ana tsüngda tasembuba Test asaya Brisbane nung December 14 nü nungi tenzuka asayatsü aser iba sülen Melbourne nung December 26 aser Sydney nung January 3 nü nungi tenzuka Test pezübuba aser pongububa asayatsü.

## Bangladesh-i U19 Asia Cup kokogo



**Luchii/December 8, 2024 (Agencies):** Deobarnü Dubai International Cricket Stadium nung U19 Asia Cup Final India aser Bangladesh na asaya Bangladesh-i run 59 agi koka parnok indang title kanga takok ngua defend süogo.

Asaya nung India-i mezüng bowling aontsü shimba sülen Bangladesh team mezüng batting amen aser parnoki asayar ajak out sür run 198 yanglua liasü.

India team nungi bowler tem rongnung Yudhajit Guha, Chetan Sharma aser Kiran Chormale nungeri wicket anana agia liasü.

Bangladesh nung batsmen tem rongnungi Md Rizan Hossain-i run timtiba yanglua pai run 47 yanglu aser Mohammad Shihab James-ia kanga tongtibang shilem agia paia run 40 yanglua liasü.

Asaya akoktsü atema run 199 nungdaka India team batting amen tenzük saka parnoki over 35.2 nung run 139 dang yangluteter asayar ajak out süa liasü.

Bangladesh nung bowler tem rongnungi Iqbal Hossain Emon aser Md Azizul Hakim Tamim nati wicket asemsem agi.

ACC Men's Under-19 Asia Cup ajanga kumtem tsüngda Asia linüktem nungi asayar tajungtem anitetogo. Iba asayamung ya Asian Cricket Council-i 1989 kum tenzüksü aser kumtem tsüngda iba asayamung 11 ben asayaogo.

U19 Asia Cup ya India-i tiben koka parnoki timbaben koka lir. India team-i 2017 aser 2023 kum dang iba asayamung final metongteti liasü.

Bangladesh-i taoba kum iba asayamung final nung United Arab Emirates koka liasü aser taküma India koka iba asayamung title benogo.

## Crasto & Ashwini nati Guwahati Masters kokogo

**Luchii/December 8, 2024 (Agencies):** India tsür badminton tarep asayar Tanisha Crasto aser Ashwini Ponnappa nati Deobarnü Guwahati Masters Super 100 badminton tournament nung tena indang title takok ngua defend sütetogo.

Final asaya nung tenati China tsür Li Hua Zhou aser Wang Zi Meng na straight-game nung koka liasü.

Top-seeded tarep ya Paris Olympics nunga asayaogo aser tenati final asaya nung asaya amokbanger asaya-a 21-18, 21-12 agi Li aser Wang na ayong ayonga koka liasü.

World No 16 Tanisha aser Ashwini nati final asaya kanga junga tenzük aser tena

8-2 agi tejakdang aküm. Ajisüaka China tsür ana yagia kanga junga asaya-a mid-game interval tashi nung point 10-11 kuma Tanisha aser Ashwini na nongshia asaya aser point 18-19 tashi kanga toktepa asaya liasü. Iba sülen India tsür ana yagi point ana atonga ngua mezüngbuba game akok.

Tanabuba game ya tarep anaprongla kanga toktepa asaya-a tenzük, saka India tsür ana yagi asendenshir kanga junga asaya-a tena 15-6 agi tejakdang aküm.

Iba sülen Tanisha aser Ashwini nati Li aser Wang na nem tena menepa asayatsü atema maongka magütsüi asaya 21-12 agi koka liasü.

## Man Utd sporting director Ashworth-i club toktsüogo



**Luchii/December 8, 2024 (Agencies):** Manchester United sporting director Dan Ashworth-i ita pongu inyakba sülen club toktsüogo.

Ashworth ya July 1 nü nungi United nung inyak tenzuka liasü. Pa Newcastle nung ita pongu gardening leave nung inyakba sülen United nung dena liasü.

Honibarnü Manchester United pur kidang goal 3-2 agi Nottingham Forest puri akokba sülen pa mapa nungi anentsütsü atema telemtetba agiogo, ta ken o jangja alirtemi metetdakja liasü.

Arishi kum 53 tain Ashworth-i club toktsüba osang ya mezüng Athletic-i Deobarnü sangdonga liasü.

United-i sangdong ka ajanga ashiba agi, ajak tangatetep nung iba telemtetba agiogo. "Club tatentep mapang ka nung liba mapang Dan-i club atema kechisa inyaksüogo item ajak atema pa dang kanga pelar aser tarutsü nung pa takok nguyonga

aotsü imlaja atar," ta kasa sangdong ajanga metetdaksü.

Forest den asaya tembangba sülen Ashworth ya club indang chief operating officer Collette Roche den press conference room adena aoba nguogo.

Pa ya senden ka nung adeni oa asütsü ta bilemer, kong pai club toktsütsü atema telemtetba agi asütsü ta amanger.

United pur taküm junga masayateti arudar aser October ita manager Erik ten Hag mapa nungi anentsüogo. Parnoki Premier League asaya teku nung asem dang akokba sülen Hag ya mapa nungi anenja liasü.

Iba sülen club-i, Ten Hag aser pa indang staff tem nem pound million 10.4 agütsüba aser pa melener Ruben Amorim atema pound million 11 agütsüba sangdonga liasü.

Honibarnü Forest makokba sülen United pur Premier League nung tang jenjang 13buba nung lir. Parnoki tang tashi nung asaya 15 nungi pongu koker lir.

## BILEMDANGANG

"Memerangdangi toktsüba ya tashimait tulutiba lir."